

## ***Loch Cheàrsanais***

Gur lòghmhor ort dearcadh fo leargainn nam fuar-bheann  
    'S an ceò tighinn a-nuas ort bho ghuaillean na h-àird';  
B'e roghainn fear sùl-bheachd bhith dlùth dha do bhruaichean —  
    B'e tiompanachd luachmhor dh'a chluasan bhith 'd phàirt.

Nuair a dh'éireas a' ghrian anns a' chiat'-mhadainn bhòidhich,  
    Cur sgàile na glòir ann an òr-bheirt a cuairt,  
Cha cheil i do roinn ort, tha thu 'n oighreachd a còirean —  
    Mar a dhearbhas a' choirill aig na h-eòin mu do bhruaich.

Tha coimhcheangal cho làidir aig nàdar ri d' ghuaimneas  
    Fo fhàsghadh nam fuar-bheann is uaigneas nan gleann;  
Gheibh eunlaith caomh-chàirdeas am fraoch-sgriachain do bhruachan:  
    Bho chunnart an turgain gheibh iad suaimhneas nach gann.

Bheir an lacha gu ìre le dì cheall a h-àlach,  
    Bidh an fhaoileag a' snàmh ort ri blàths agus fuachd;  
Bidh chearc-uisg' tighinn far faicill gu trabhaich d' oirthire  
    'S gur tric corra-ghritheach le slì ob-cheum mu d' bhruaich.

'N àm don ghealaich bhith 'g éirigh air réiteachd a cuairtean  
    'S i deàrrsadh a-nuas ort le buaidhean an àigh,  
Bidh sàmhchair is sìochaint mu chrìochan Glaic Ruairidh  
    Far 'n do dh'fhiosraich mo chluasan-sa fuaim a' chiùil àird.

Bidh cuimhneachain taitnis ann an taisgeadh mo smuaintean  
    Mu d' òban tha cuartaichte le fuar-bheanntan àrd' —  
Far 'n do ghrunnaich mi casruisgt' air beag airsteal no gruaman  
    B' fhada guilm na truaigh' anns an uair bho mo dhàil.